

Diocesis e raits claustralas

Istorgia da la Svizra en il temp medieval, part 2

■ Dapi la fin dal quart tschientaner sa furman ils emprims uvestgjeus che cumpiglian er territori da la Svizra odierna. La conversiun al cristianissem è però in process che cuntinuescha; surtut dal temp dals Francs vegnan er ils udens monastics e la fundaziun da novas claustras a servir a quest intent. Tant ils uvestgjeus sco er las claustras sa sviluppan a pussanzas territorias che giogan ina rolla centrala entaifer las raits politicas, economicas e culturalas dal temp medieval.


Las diocesis e la sutdivisiun ecclesiastica

Episcopats daventan pussanzas territorias
Cun l'Edict da Milaun il 313 è il cristianissem daventà la religiun statala da l'Imperi roman. En il 5avel tschientaner passa l'administraziun romana en ils mauns dals uvestgs, furmond la basa da la teocrazia medievala che vegn a culminar en il 11avel e 12avel tschientaner, cur che l'imperatur tudestg als conceda ils dretgs roials. L'interpresa da construcziun territoriala e sociala dals Carolings sa basa tant sin ils uvestgs e sin ils avats sco sin ils conts, uschia che l'organisaziun ecclesiastica s'installa en la structura feudala, salvond dentant ina part da l'autonomia che vegn a provocar la disputa da las investituras tranter il papat e l'imperi a partir dal 10avel tschientaner.

Ils manaders da la baselgia n'han betg descendents directs, uschia che la baselgia n'ha er betg ils problems da divisiuns d'iertra e da schlatas che moran ora sco ils auters feudals. Latiers profitan els da la dieschma (taglia regulara ch'els purs stuevan pajar en natiralias) e da las donaziuns (era da terren) ch'els incassan grazia a lur monopol dals instruments che segireschan il salit da l'olma. I resulta in'accumulaziun immensa da pussanza e da ritgezza, a la quala èn participads perfin ils moviments religios da refurma che l'accusan. Quai èn ils meds che permettan er a la baselgia da far las investiziuns artisticas essenzials per si'existenza, spezialmain sin il champ liturgic.

Ils uvestgjeus sin il territori da la Svizra odierna

La preschientscha d'uestgs en ils centers urbans dal territori svizzer è documentada dapi la fin dal quart tschientaner. La cristianisaziun da la champagna para d'esser avanzada spert, surtut en la part occidentala da la Svizra Bassa ed al sid. Ils Burgognais, gia cristians ma aderents da la duc-



Document da donaziun dal retg burgognais Rudolf a la claustra da Saint-Maurice (VS), 1018.

FOTOS: PD

trina ariana, sa converteschan a la cretta «ortodoxa» a l'entschatta dal 6avel tschientaner. Tras lur retg Sigismund daventa la chapitala Geneva in center episcopal grondius e Saint-Maurice d'Againe ina spezia da citad songta cun ina radiaziun considerabla. La conversiun dals Alemans ch'eran anc pajauns va bier pli plaun, cumenzond en il 6avel e 7avel tschientaner cun l'activitad dals paders missiunaris irlandais, englais e retics. Surtut ils Francs la promovon per sa procurar il sustegn da la baselgia envers lur predecessors arians, la mettend al servetsch da lur politica d'assimilaziun e d'expansiun.

En la segunda mesad dal 6avel tschientaner ha lura lieu la redistribuziun da las sedias episcopalas. Ils motifs paran d'esser stads per part la tschertga da lieus protegids meglier, ma er la nova situaziun demografica e territoriala. Entant che las sedias da Geneva e da Cuira restan, va quella d'Avenches a Losanna, quella da Martigny a Sion e quella d'Augst a Basilea; quella da Windisch vegn abandonada ed ins stgaffescha in nov episcopat a Constanza, entamez il territori aleman. Il svilup da l'influenza rurala dals episcopats maina a la cunfinaziun da las diocesis. Dal 11avel al 13avel tschientaner vegnan ellas partidas en archidiaconats e decanats. Las praventadas n'èn dentant betg fitg enconuschentas ed èn sco ch'i para sa furmadas pir cur ch'ils

Carolings han introduci la dieschma en il 9avel tschientaner; conform a la situaziun demografica, datti al cumenzament mo paucas.

L'influenza culturala da las sedias episcopalas

Igl è evident che l'uestvg e la sedia episcopala han gi ina grond'influenza culturala, surtut en il territori da la diocesa. La citad episcopala concentrescha per lung temp ina part essenziala da las ritgezhas e da las investiziuns artisticas enturn la catedrala, la residenza episcopala ed ils ecclesiastics che circumdeschan l'uestvg, surtut la communitad dals canonis dal chapel catedral. Ultra da sias empustaziuns directas ed indirectas, ha l'uestvg ina buna posiziun per definir a l'intern da sia diocesa ils models formals ed il «nivel qualitativ» che vala sco mesira per tut quels ch'al vulan imitar u ch'emprovan da rivalisar cun el. Quest fenomen sa manifestescha il pli ferm en ils episcopats da Sion e da Cuira, furmads da valladas uschiglio relativamain isoladas. La rait da relaziuns, da la quala ils uvestgs profitan sin fundament da lur terra da derivanza, da lur furmaziun, da lur participaziun a las sinodas e da lur contacts professionals è damai l'unic factur determinant per derasar novas furmas. Tut quai vala natiralmain er per il proxim stgalim: ils arch-uestgs e lur arch-uestgjeus (cumponids da plirs episcopats).

L'influenza stilistica da las catedralas sin las baselgias construidas en la diocesa è en general fitg gronda. I fiss fascinant da s'imaginar ina planta genealogica da las baselgias medievalas, analoga al sistem feudal, sco che propona l'istoricher d'art Adolf Reinle observond l'influenza da la baselgia da l'arch-uestvg a Besançon sin la baselgia da chapel da Saint-Ursanne e l'effect da quest'ultima sin ina seria da baselgias pli modestas en in radius da 30 fin 60 km. Sch'i na sa tracta betg gist d'ina situaziun da monopol, èsi però er sin il champ artistic pauc probabel che las relaziuns d'appartegnentscha sajan pli simples, pli mecanicas e main conflictualas che sin quel politic. Tenor Claude Lapaire deriva la baselgia da Saint-Ursanne era da la catedrala da Basilea (en fasa da construcziun), entant ch'ils canonis da Saint-Ursanne eran en conflict avert cun las pretenziuns che l'uestvg emetteva sur da lur chapel; las sculpturas da la baselgia da chapel èn visiblamain parentadas cun la «porta da son Gallus» da Basilea, ma paran d'esser l'ovra d'in maister stilisticamain pli avanzada ch'ha fatg valair sia influenza er a Basilea, a Strassburg ed a Freiburg en Brisgovia.

Cunfins ecclesiastics e cunfins politics

Las divisiuns ecclesiastics na sa refereschan tutavia betg al territori da la Svizra odierna, quai ch'è gia vegni constatà per las structuras politicas e la repartiziun linguistica. Las sedias episcopalas èn en posiziuns plitost periferas, entamez lur diocesis che s'extendan vers la Savoia, l'Alsazia, il Baden-Württemberg ed il Tirol. Il Tessin na posseda nagina sedia episcopala e daventa l'object d'ina viva concorrenza tranter l'episcopat da Com (che deriva dal patriarcat d'Aquileia) e l'arch-uestvg da Milaun. Sin il nivel dals arch-uestgjeus èn insumma tut las sedias a l'ester: Geneva dependa da l'arch-uestvgjeu da Vienne en la Dauphiné, Losanna e Basilea da quel da Besançon, Constanza e Cuira (dapi 843) da quel da Mainz, Sion finalmain dependa da la Tarentaise ch'ha ses center a Moutiers en Savoia.

Questa situaziun vegn a sa midar pir cun il stadi dal 1848, ensem cun la tendenza en l'entira Europa da coordinar ils cunfins ecclesiastics cun quels politics. Il 1859 vegn la Confederaziun a dismetter tutta giurisdicziun episcopala estra sin territori svizzer e vegn a stgaffir novas diocesis ad hoc, il 1888 er quella dal Tessin; il papa n'ha dentant betg permiss da fundar in arch-uestvgjeu unic, dal qual avessan fatg part tut ils episcopats svizzers; quels èn damai dependents directamain da Roma.

Las raits claustralas

Cumenzaments

La geografia ecclesiastica na cumpiglia betg unicamain quella dals episcopats e dals arch-uestgjeus. Durant la perioda da decadenza urbana dal temp autmedieval èn las claustras centers economicas e culturals d'emprima qualitat. Ils muntgs n'èn betg mo empustaders d'ovras d'art, ma er sezs producents, spezialmain en l'art dals cudeschs. Tras il missiunariat da l'epoca eroica, las filialas che sa distargavan da las claustras pli grondas, ils regruppaments provegnints da moviments da refurma e las intenziuns centralistics avevan ils muntgs a medem temp er la funcziun da propagaders. Senza negliger il possess funsil, taissan las claustras lur raits da comunicaziun fitg vastas e mintgatant imprevisiblas surtut cun agid da lur territoris e spezialmain da las diocesis. L'exempel dals eremits e dals muntgs cumparids durant il terz tschientaner en il Proxim Orient fa scola en l'Europa Occidentala a partir da la segunda mesad dal quart tschientaner. En il 5avel tschientaner fundeschan ils «Pères du Jura» las claustras da Saint-Claude e da Romainmôtier ed il 515 appellescha il retg Sigismund als muntgs da Romainmôtier da fundar la claustra da Saint-Maurice. Il 590

cumenza l'Irlandais Columban sia missiun sin il continent e funda surtut las claustras da Luxeuil en las Vogesas, da Briganza e da Bobbio sper il golf da Genua. Ses scolar Gallus sa stabilescha sper il Lai da Constanza, nua ch'ins vegn a fundar ina claustra l'onn 612. Il 747 vegnan ses muntgs a remplazzar la regla irlandaisa tras quella da son Benedetg da Nursia.

Vers la fluriziun culturala dal temp carolingic

Cunquai che Columban aveva obtegni il sustegn dals nobels francois, èn ils muntgs persuerter daventads instruments da lur expansiun politica en il territori aleman e vers l'Italia. Il Giura e las Alps permettan da tscherner per las claustras lieus che satisfan tant al basegn religios d'isolaziun sco a las exigenzas strategicas: colonisar regiuns pauc segiras u pauc populadas, fixar etappas e posts da surveglianza per las lungas vias da comunicaziun. Il muntg Sigisbert da derivanza (probabla) irofranca po fundar en il «desert» (Desertina, Disentis) da la Surselva ina claustra ch'è en cas da controllar tant il Culm d'Ursera (Alpsu) sco il Lucmagn. Sumegliantamain han ins fundà il 640 las claustras giurassianas da Moutier-Grandval e da Saint-Imier en la regiun da cunfin cun il spazi roman, lura quella sin l'insla da Reichenau sper Constanza e finalmain quella che miran directamain sin ils pass retics: Pfäfers/Faveras (725), Mustér (claustra per propi vers il 750), Mistail (segunda mesad dal 8avel tschientaner) e Müstair, ca. 780-790.

Il nivel artistic da la claustra da Müstair mussa tge impurtanza ch'avevan per ils Carolings las colliaziuns che manavan tras la Val Müstair (er sch'il grond traffic passa oz per autras vias). Igl è pussaivel che Carl il Grond na l'ha betg fundà sez (sco che pretendia la tradiziun), ma el l'ha segir promovì ed ils frescos da la baselgia da la claustra – il pli grond complex da pictura monumental carolingica anc existent – paran da derivar dal temp da si'encurunaziun a Roma. I dat parallelas stilisticas da Müstair tant en l'Italia dal Nord sco a la curt palatina d'Aix-la-Chapelle e surtut er en la decoraziun dals lieus songts en Palestina.

Svilup suenter la divisiun dal Reginavel dals Francs

Ludivic il Tudestg, engaschà suenter la divisiun dal Reginavel francois en in cumbat cunter las quaidas d'autonomia da la noblezza alemana, pratitgescha la medema politica cur ch'el fundescha la pussanta abazia da dunnas dal Fraumünster a Turitg e construescha in palaz roial (853) per tegnair pli ferm en frain Son Gagl, Constanza e Reichenau. La claustra da Nossadunnaun, fundada il 934 tras ils ducas da Svevia, vegn a profitar dal fatg che Otto I ha nominà ses avat «prinzi da l'imperi».


Guglielm d'Acquitania fundescha il 910 en il Reginavel da l'Auta Burgogna la claustra da Cluny e dat a ses muntgs il dretg da tscherner libramain il successur da l'emprim avat e da dependar directamain da la giurisdicziun papala. Cluny elavurescha lura ina refurma da la regla benedictina che privilegescha l'activitad liturgica (cun sias implicaziuns artisticas) e furma en dus tschientaners in imperi monastic centralisà che sa cumpona da plirs tschient claustras. Las abazias da Romainmôtier e da Payerne, er en territori burgognais, vegnan surdadas a Cluny il 928 ed il 999; sur l'influenza dal tschingavel avat da la chasa materna, songt Odilon, reconstrueschan omduas lur baselgia en in stil che para da derivar directamain da la segunda baselgia abaziala da Cluny.

La preschentaziun:

Dossier «Istorgia da la Svizra en il temp medieval».

Dapi infurmaziuns:

chatta.ch/?hiid=1431
www.chatta.ch



Baselgia romanica a Biasca (TI), fin dal 11avel tschientaner.